

Islamović Husein, geometar

Rođen je 5.01.1945. godine i umro u Sarajevu 3.07.2000. godine.

Ostavši bez oca još u prvim svojim dječaćkim koracima Husein Islamović je osjetio šta znači probijati se kroz život sam, a uz to brinuti se o svojoj majci i sa njom skupa dijeliti dobro i loše a on je to dobro činio sve do majčine smrti.

U Sarajevu 1964 godine završava srednju geodetsku školu i počinje prve radne obaveze u sekciji Banja Luka na obnovi Banja Luke poslije zemljotresa.

Potom prelazi na rad u Geodetski zavod Sarajevo. U Sarajevu je radio u Odjelenju za premjer i kao član tog kolektiva bio je angažovan na premjeru širom tadašnjeg djelovanja po cijeloj Bosni.

Njegovi radovi na dešifrovanju bili su uvijek veoma kvalitetni, a uglavnom je dešifrovao gradove tako da se iza njega bez poteškoća moglo nastaviti daljnju fazu rada – izlaganje.

Kasnije je u istom kolektivu – Geodetskom zavodu radio na Primijenjenoj geodeziji uglavnom u Sarajevu takođe sa punim uspjehom.

Kao radnik Geodetskog zavoda izvodio je takođe vrlo uspješno i radove u Libiji.

Njegove radne kolege su ga veoma često birale kao svog predstavnika u organe upravljanja a on ih je uspješno predstavljao u tim tijelima i komisijama.

U toku rata prelazi u opštinu Stari grad, gdje nove zadatke takođe uspješno obavlja.

Iza njega su ostale tri primjerno odgojene kćerke koje nažalost nije dočekao da potpuno osamostali. Sada su u srednjoj školi odlični đaci.

Radne kolege, komšije koji su ga posjećivali u bolnici vidjeli su da je hrabro podnosio svoju kratku a podmuklu bolest koja ga je otrgla od nas u njegovoj 55. godini života.

Dokaz da je bio priznat i omiljen u sredini u kojoj je živio i radio bio je ispraćaj i posljednji oproštaj od njega a taj oproštaj je zbilja bio sa rijetko velikim učešćem njegovih kolega i sugrađana.

A. Č.